

MANGALA SUTTA

*Evam me sutam
Ekam samayam Bhagavā
Sāvattiyam viharati
Jetavane Anāthapindikassa ārāme
Atha kho aññatarā devatā
Abhikkantāya rattiyā abhikkanta vanna
Kevala kappam Jetavanam obhāsetvā
Yena Bhagavā tenupasamkami
Upasamkamitvā bhagavantam
Abhivādetvā ekamantam atthāsi
Ekamantam thitā kho sā devatā
Bhagavantam gāthāya ajjhabhāsi*

*Bahū devā manussā ca
Mangalāni acintayum
Ākankhamānā sotthānam
Brūhi mangala muttamam*

*Ārati virati pāpā
Majjapānā ca samyamo
Appamādo ca dhammesu
Etam mangala muttamam*

*Asevanā ca bālānam
Panditānañ ca sevanā
Pūjā ca pūjanīyānam
Etam mangala muttamam*

*Gāravo ca nivāto ca
Santutthī ca kataññutā
Kālena dhamma savanam
Etam mangala muttamam*

*Patirūpa-desā vāso ca
Pubbe ca katapuññatā
Atta sammā panidhi ca
Etam mangala muttamam*

*Khanti ca sovacassatā
Samanānañ ca dassanam
Kālena dhamma sākacchā
Etam mangala muttamam*

*Bāhu saccañ ca sippañ ca
Vinayo ca susikkhito
Subhāsītā ca yā vācā
Etam mangala muttamam*

*Tapo ca brahmacariyāñ ca
Ariyasaccāna dassanam
Nibbāna sacchikiriya ca
Etam mangala muttamam*

*Mātā pitu upatthānam
Puttadārassa sangaho
Anākulā ca kammantā
Etam mangala muttamam*

*Phutthassa loka dhammehi
Cittam yassa na kampati
Asokam virajam khemam
Etam mangala muttamam*

*Dānañ ca dhammacariyā ca
Ñātakānañ ca sangaho
Anavajjāni kammāni
Etam mangala muttamam*

*Etādisāni katvāna
Sabbattha maparājita
Sabbattha sotthim gacchanti
Tam tesam mangala-muttamam ti*